



Llywodraeth Cymru  
Welsh Government

# Y Cynnig Gofal Plant ar gyfer Cymru

## Cwestiynau cyffredin i rieni yn yr ardaloedd peilot

**Beth yw'r cynnig gofal plant?** Bydd y cynnig gofal plant newydd yn darparu 30 awr o addysg gynnar a gofal plant am gyfnod o hyd at 48 wythnos y flwyddyn ar gyfer plant 3 a 4 oed i rieni cymwys sy'n gweithio.

**Beth y mae'n ei olygu i mi fel rhiant?** Os oes gennych chi blentyn sy'n 3 neu'n 4 oed, mae'r hawl i gael addysg gynnar ar gael ichi nawr. Os ydych chi'n gweithio, gallech chi gael oriau ychwanegol o ofal plant wedi ei ariannu gan y Llywodraeth fel eich bod yn cael cyfanswm o 30 awr o ofal plant ac addysg gynnar yr wythnos am gyfnod o hyd at 48 wythnos y flwyddyn, yn dibynnu ar ba bryd y bydd eich plentyn yn dathlu ei ben-blwydd.

**Beth yw addysg gynnar?** Mae hawl gan blentyn i gael **addysg gynnar** (Meithrin Cyfnod Sylfaen) o'r tymor ar ôl ei ben-blwydd yn 3 oed. Mae pob awdurdod lleol yn darparu isafswm o 10 awr o addysg gynnar yr wythnos, naill yn yr ysgol leol neu mewn lleoliad tebyg, fel lleoliad gofal dydd neu ganolfan gymunedol. Yn ystod y tymor ysgol, bydd yr addysg gynnar yma yn rhan o 30 awr y cynnig gofal plant. Yn ystod gwyliau ysgol, pan nad oes addysg gynnar, bydd y cynnig yn rhoi 30 awr o ofal plant am gyfnod o hyd at 9 wythnos. Gall eich Gwasanaeth Gwybodaeth i Deuluoedd lleol eich helpu i ddarganfod darpariaeth cofrestredig sy'n ateb eich gofynion.

**Sut y byddaf yn gwybod a ydw i'n gymwys?** Mae rhieni plant 3 a 4 oed eisoes yn gallu manteisio ar yr hawl i gael addysg gynnar. Rydych chi'n gymwys i gael y gofal plant ychwanegol os ydych chi'n byw yn ardal y cynllun peilot, os oes gennych blentyn o fewn yr ystod oedran, a'ch bod yn ennill ar gyfartaledd isafswm wythnosol cyferth ag 16 awr ar isafswm cyflog cenedlaethol neu ar gyflog byw cenedlaethol neu fwy. Os yr ydych yn deulu unig riant bydd yn rhaid i chi fod mewn gwaith a mewn teulu dau riant, mae angen i'r ddau ohonoch fod yn gweithio. Os yr ydych yn hunangyflogedig neu ar gontract dim oriau bydd disgwyl ichi brofi hyn drwy gyflwyno dogfennau perthnasol. Cysylltwch â'ch Gwasanaeth Gwybodaeth i Deuluoedd i gael rhagor o wybodaeth.

**Pa ardaloedd yw'r ardaloedd peilot?** Maent mewn ardaloedd dynodedig o Abertawe, Caerffili, Gwynedd, Rhondda Cynon Taf, Sir y Fflint ac Ynys Môn. Bydd y cynllun ar gael ar draws Blaenau Gwent. Mae rhagor o wybodaeth am yr ardaloedd hyn i'w gweld ar wefannau'r awdurdodau lleol. Mae angen ardaloedd peilot arnom er mwyn profi'r cynnig i wneud yn siŵr ei fod yn gweithio, ond bydd ar gael ledled Cymru yn y pen draw.

**Gai ddewis unrhyw ddarparwr gofal plant?** Gallwch, ar yr amod bod y darparwr hwnnw yn hapus i fod yn rhan o'r cynnig a'i fod wedi ei gofrestru ag AGGCC neu â'r Swyddfa Safonau mewn Addysg (yr arolygiaethau ar gyfer lleoliadau gofal plant). Gallant wneud hynny drwy gysylltu â'r Gwasanaeth Gwybodaeth i Deuluoedd lleol. Gall y darparwr gofal plant fod wedi eu lleoli y tu allan i'ch ardal beilot, y tu allan i'ch sir, neu fod yn Lloegr hyd yn oed, os ydych chi'n byw ar y ffin. Nid oes unrhyw gyfyngiad o ran pa bryd y gallwch ddefnyddio'r oriau gofal plant ychwanegol, ond eich cyfrifoldeb chi yw dod o hyd i ddarparwr gofal plant sy'n addas i anghenion eich teulu chi. Gall y Gwasanaeth Gwybodaeth i Deuluoedd eich helpu drwy ddarparu gwybodaeth ar yr holl leoliadau gofal plant.

**Fydd angen imi dalu am unrhyw beth?** Mae'r Cynnig Gofal Plant yn cyllido uchafswm a chyfanswm o 30 awr o addysg gynnar a gofal plant. Mae hyn ar gyfer yr addysg a'r gofal y mae'r gweithwyr proffesiynol yn y lleoliad yn eu darparu. Nid yw'n cynnwys bwyd, cludiant i leoliadau eraill ac oddi yno na gweithgareddau oddi ar y safle sy'n gofyn am dâl ychwanegol, a bydd eich darparwr yn gallu codi tâl amoch chi am y pethau hyn. Bydd y costau cludiant yn ddiabyddol ar leoliad eich cartref a pha mor bell y mae angen iddynt deithio. Ni ddylai darparwr godi mwy na £7.50 y diwrnod am fwyd neu £4.75 am hanner diwrnod (yn cynnwys cinio).

**Oes rhaid imi ddefnyddio'r 30 awr yr wythnos yn llwyr?** Nac oes. Chi sy'n dewis faint o'r 30 awr yr ydych chi am eu defnyddio. Fodd bynnag, os na fyddwch chi'n defnyddio pob un o'r 30 awr mewn wythnos, ni allwch chi ddefnyddio'r oriau sy'n weddill mewn wythnos arall. Gallwch chi dalu am oriau ychwanegol eich hun yn seiliedig ar gontract preifat rhyngoch chi a'ch darparwr gofal plant.

**Sut ydw i'n gwneud cais?** Gallwch wneud cais am y cynnig, gan gynnwys y lle addysg gynnar y mae hawl gennych ei gael, drwy eich awdurdod lleol. Cysylltwch â'ch Gwasanaeth Gwybodaeth i Deuluoedd i gael rhagor o wybodaeth.